

## BATera

«**B**at-eginik ari gara; bat-eratu gaitezen» idatzi zuen norbaitek, denok gogoan dugun 'Bateginik' kanpaina haren erdian. Hona hemen orain BAT aldizkaria, Euskararen aldeko mugimendu herritarra sendotzera eta bateratzera datorrena.

Goi-filosofiatik abiatuko al gara? Unibertsoan diren guztien printzipio behinenari izen horixe eman bait zioten antzinako filosofoek: BATa. Gero-ra Jainkoaren beraren izen bihurtu zuten BAT: «Aniztasun ororen haraindik eta berezitasun ororen iturburua jarria, hor daukagu (...) 'bat'a bera, Izate Gorenaren eta Ongi nagusiaren, hots, Jainkoaren beraren izena», dio Piarres Xarritton-ek Filosofi Hiztegian, Plotino eta beste filosofo batzuren gogamendua adieraziz.

Urrutitxo joan gara, zalantzarik gabe. Hala ere, Euskal Herriaren hasieran EUSKARA zegoen Herriaren eratzaille; geroztik Euskarak eman dio izena Herri honi; eta herritarren arteko ezberdintasun, gatazka, kontradikzio eta guzti, Euskarak batzen gaituela aitortu ohi dugu sarritan. Ez dugu us-te, ordea, Euskara Euskal Herri eta gizarte historikoaz haraindiko ezer denik; alderantziz geure historia egunerokoan egiaztatu beharrean gaude euskaldunon bateratzailea dugula Euskara, geure Herriaren desintegrazioari uko eginez.

Ezaguna da izan klase boteredunen 'beharra', herritarren hizkuntzaz 'jabetzeara', beraien boterearen funtsezko euskarritzat eta zurigarritzat hizkuntza erabiliz. Kanpotik nahiz barrutik historian zehar —eta gaur— beren alde Euskara monopolizatu dutenek nahiz Euskararen kontra euskaldunak manipulatu dituztenek, herritarrok zatitzeko eta banatzeko erabili dute Euskara.

Euskararen monopolizazioaren eta manipulazioaren kontrako protesta eginez abiatzen da BAT aldizkaria, aitormen oinarrizko honekin: «Euskaldun —euskal herritar— guztiona eta guztiontzat da Euskara». Abiaburuan herritar guztiok batzen bagaitu gure hizkuntza nazionalak, guztiok horren berreskurapen osoaren ahaleginean bateratzea du helburutzat BATek. Horretarako lekua ireki nahi du: albiste, azterketa, gogoeta eta kritikarako bateragunea.

Bateragunea izango bada ere, ez da erdigunea aldizkari hau, euskara bera bait da euskaldun bakoitzaren eta euskal elkartearen 'erdigunea', Txepetxen hitzez. Erdiguneratze-prozesua da Euskararen berreskurapena eta euskaldunon euskalduntzea. Euskal Herriaren BATa historikoa Euskara da, izan ere.

«Hizkuntza ez da gramatika bat: Deklinazioa, Aditza, Sintaxia, hiztunek osotzen duten Hizkuntz Komunitate bat baizik», idatzi berria du Iñaki Larrañagak. Edonolako komunitatek bezala, bitariko dimentsioa du hizkuntzazkoak: barrurakoa eta kanporakoa. Barneko kidesasunean (elkartasunean) eta elkartearen bere buruarekiko berberatasunean mamitzen da lehenengoa; besteenganako berezitasunean baieztatzen da bigarrena. 'Bat-eratzea' eta 'at-eratzea' edozein elkarteren bi mugimenduak dira: barrurakoa eta kanporakoa.

«Euskara ihalgi ('atera') hadi ... mundura» ezingo da gertatu, Euskararen erdigunera herritarrok bateratzen ez bagara. Euskaldunok *euskaran* bat-eratzea eta euskaldunok *euskaraz* at-eratzea, gure hizkuntzazko berreskurapen osoaren bi alderdiak dira.

Euskararen erdigunerako Herri osoaren bidegintza honetan bateratzeko deia zabaldu nahi du hasieratik bertatik BAT aldizkari honek: Kultur indar eta talde guztiak batera, sindikatu guztiak batera, alderdi politiko guztiak batera, herrialde guztiak batera, erakunde publiko, pribatu eta herritar guztiak batera... Herritar guztiok batera! Bakoitza bere lekutik eta egoeratik, baina batera!

Orduan Euskararen 'aurkako' monopolizatzaileak, minimizatzaileak eta manipulatzaileak atzean geldituko dira bakarrik, euskaldunok erdaraz banatu nahi gaituztelako, baina ezingo dutelako.

***EKB (Euskal Kulturaren Batzarrea)***